

Broj: 07-02/2-3429/23
Sarajevo, 03.11.2023. godine

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primljeno: 07-11-2023			
Org. jed.	Broj	Prijava	Vrijednost
05/1	- 02 -	408	23.

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
PREDSTAVNIČKI DOM
n/r gosp. Hamdija Abdić, poslanik

PREDMET: Odgovor na poslaničko pitanje, dostavlja se

Poštovani,

Federalnom ministarstvu rada i socijalne politike je putem Vlade Federacije Bosne i Hercegovine, aktom broj: 03-04-1253-24/23 od 31.10.2023. godine, dostavljen dopis sekretara Predstavničkog doma Parlamenta Federacije Bosne i Hercegovine broj: 05/1-02-408/23 od 30.10.2023. godine, te u prilogu istog poslaničko pitanje koje ste postavili na 8. vanrednoj sjednici Predstavničkog doma Parlamenta Federacije Bosne i Hercegovine održanoj 25.10.2023. godine, a koje se odnosi na raspodjelu sredstava ostvarenih po osnovu naknada za priređivanje igara na sreću.

S tim u vezi, sa aspekta nadležnosti Federalnog ministarstva rada i socijalne politike, dajemo sljedeći:

ODGOVOR

Federalno ministarstvo rada i socijalne politike (u daljnjem tekstu: Ministarstvo) je, dana 08.03.2023. godine, u skladu sa Uredbom o kriterijima za utvrđivanje korisnika i načinu raspodjele prihoda ostvarenih po osnovu naknada za priređivanje igara na sreću („Službene novine Federacije BiH“, br. 89/15, 11/17 i 87/22), raspisalo Javni konkurs za finansiranje projekata i programa iz sredstava dijela prihoda ostvarenih u Budžetu Federacije Bosne i Hercegovine po osnovu naknada za priređivanje igara na sreću. Predmet Javnog konkursa je raspodjela sredstava iz dijela prihoda ostvarenih u Budžetu Federacije Bosne i Hercegovine po osnovu naknada za priređivanje igara na sreću, koji se uplaćuju u skladu sa Zakonom o igrama na sreću („Službene novine Federacije BiH“, br. 48/15 i 60/15).

Naime, Federalno ministarstvo finansija je polovinom februara 2023. godine, Ministarstvu dostavilo informaciju o iznosu sredstava prikupljenih od igara na sreću koja se u skladu sa Uredbom za 2023. godinu raspodjeljuju na sljedeći način:

Federalno ministarstvo rada i socijalne politike (20%)

728.458.82 KM

Federalno ministarstvo nauke i obrazovanja (15%)	546.344,11 KM
Federalno ministarstvo kulture i sporta (40%)	1.456.917,64 KM
Federalno ministarstvo zdravstva (15%)	546.344,11 KM
Federalno ministarstvo razvoja, poduzetništva i obrta (10%)	364.229,41 KM

Ovakav način raspodjele sredstava prikupljenih od igara na sreću, prema kojem je ovom Ministarstvu za raspodjelu pripalo samo 20% od ukupnog iznosa sredstava, odnosno 728.458.82 KM, rezultat je stupanja na snagu Uredbe o izmjenama Uredbe o kriterijima za utvrđivanje korisnika i načinu raspodjele prihoda ostvarenih po osnovu naknada za priređivanje igara na sreću („Službene novine Federacije BiH“, broj: 87/22), koju je donijela prethodna Vlada, te na taj način udruženjima osoba sa invaliditetom, žrtvama porodičnog nasilja i građanima koji žive ispod linije siromaštva oduzela oko 1,2 miliona KM, na način da je ta sredstva usmjerila za finansiranje projekata iz oblasti kulture i sporta. Naime, Uredba o izmjenama i dopunama Uredbe, koju je donijela prethodna Vlada, stupila je na snagu 01.01.2023. godine, te je istom izmijenjena raspodjela navedenih sredstava po ministarstvima, na način da su ovom Ministarstvu ta sredstva smanjena sa iznosa od 50% na iznos od 20%, te ista u najvećem dijelu preusmjerena na projekte iz oblasti kulture i sporta i manji dio na projekte iz oblasti razvoja, poduzetništva i obrta. S obzirom da je prije donošenja pomenute Uredbe o izmjenama i dopunama Uredbe, odnosno u 2022. godini ovom Ministarstvu pripadalo 50% ukupnog iznosa sredstava od igara na sreću, odnosno 1.917.134.01 KM, to je prethodna Vlada na taj način od najugroženijih kategorija društva oduzela oko 1,2 miliona KM.

DOKAZ: Uvid u član 5. Uredbe o kriterijima za utvrđivanje korisnika i načinu raspodjele prihoda ostvarenih po osnovu naknada za priređivanje igara na sreću sa izmjenama, objavljen na web stranici ministarstva www.fmrsp.gov.ba, u obavijesti pod naslovom Hornologija – Javni konkurs za finansiranje projekata i programa iz sredstava dijela prihoda ostvarenih u Budžetu FBiH po osnovu naknada za priređivanje igara na sreću

Na Javni konkurs objavljen dana 08.03.2023. godine, prijavu je podnijelo 159 aplikacija, a s ciljem realizacije Javnog konkursa, Ministarstvo je formiralo Komisiju za pregledanje i provjeru formalne ispravnosti podnesenih zahtjeva, u smislu njihove blagovremenosti, potpunosti i ispravnosti. Komisija je sačinila izvještaj u kojem je navela da od 159 aplikacija prijave 102 aplikanta nisu formalno ispravne, što je manje od 50% realizacije, odnosno oko 64% prijave aplikacija nije ušlo u daljnju konkursnu proceduru koja podrazumijeva ocjenu i bodovanje predloženih projekata. Dakle, samo 57 aplikacija je zadovoljilo uslove u pogledu formalne ispravnosti, te je samo tih 57 aplikacija steklo uslov da budu predmet ocjene i bodovanja predloženih projekata. S obzirom da su utvrđeni formalni nedostaci u navedene 102 aplikacije bili uglavnom tehničke prirode, u smislu da nije ispunjen jedan ili više kriterija koji se odnose na tehničku ispravnost dokumentacije i tome slično, te da ni na koji način ne oslikavaju suštinsku vrijednost dostavljenih projekata, Ministarstvo je razmotrilo mogućnost pronalaska rješenja koje će dovesti do uspješnije realizacije Javnog konkursa. Naime, veliki broj aplikacija za koje je utvrđeno postojanje formalnih nedostaka je posljedica činjenice da je 01.01.2023. godine stupila na snagu Uredba o izmjenama Uredbe o kriterijima za utvrđivanje korisnika i načinu raspodjele prihoda ostvarenih po osnovu naknada za priređivanje igara na sreću, koju je donijela prethodna Vlada, a kojom je

izmijenjena dokumentacija koja se dostavlja uz prijave, te po prvi put predviđeno bodovanje općih kriterija, što umnogome doprinosi smanjenju prolaznosti projekata udruženja koja imaju manje realizovanih projekata u periodu prije objave Javnog poziva. Iz navedenog jasno proizlazi da je veliki broj udruženja usljed navedenih izmjena imao određene tehničke propuste prilikom podnošenja zahtjeva, a kao posljedica činjenice da su se zahtjevi po prvi put podnosili u skladu sa izmijenjenim uslovima.

DOKAZ: Uvid u Uredbu o izmjenama Uredbe o kriterijima za utvrđivanje korisnika i načinu raspodjele prihoda ostvarenih po osnovu naknada za priređivanje igara na sreću („Službene novine Federacije BiH“, broj: 87/22)

S tim u vezi, utvrđeno je da je realizacija konkursa ispod najniže granice, te da je potrebno donijeti odluku o poništenju navedene konkursne procedure i da će Ministarstvo raspisati novi Javni konkurs kako bi se sredstva racionalno iskoristila, te kako bi se aplikantima pružila mogućnost ponovne prijave i ispravke formalnih nedostataka. Također, a kako bi se aplikantima olakšao postupak ponovne prijave, Ministarstvo je omogućilo svim prijavljenim aplikantima da izvrše povrat dokumentacije, kako bi se mogli prijaviti na ponovni Javni konkurs. Iz navedenih razloga, netačni su Vaši navodi iz postavljenog pitanja kako sam, odmah nakon što sam preuzeo funkciju poništio Javni poziv prethodne Vlade kako bih ja odlučivao o podjeli novca. Dakle, osnovni razlog poništenja Javnog konkursa nije se ogledao u namjeri da ja odlučujem o podjeli novca, već u namjeri da se većem broju udruženja omogući da dođu u priliku da se njihovi projekti za unaprijeđenje posložaja osoba sa invaliditetom ocijene i boduju, a ne da isti budu eliminisani iz dalje procedure isključivo zbog formalnih propusta, koji su opet posljedica donošenja Uredbe o izmjenama i dopunama Uredbe, koja je stupila na snagu 01.01.2023. godine, te koju je donijela prethodna Vlada.

DOKAZ: Uvid u Odluku o poništenju Javnog konkursa za finansiranje projekata i programa iz sredstava dijela prihoda ostvarenih u Budžetu Federacije Bosne i Hercegovine po osnovu naknada za priređivanje igara na sreću, objavljen na web stranici ministarstva www.fmrsp.gov.ba, u obavijesti pod naslovom Hornologija – Javni konkurs za finansiranje projekata i programa iz sredstava dijela prihoda ostvarenih u Budžetu FBiH po osnovu naknada za priređivanje igara na sreću

Istovremeno sa poništenjem objavljenog Javnog konkursa, Ministarstvo je Vladi Federacije Bosne i Hercegovine još u maju 2023. godine uputilo inicijativu za izmjene i dopune pomenute Uredbe, na način da se sredstva prikupljena od igara na sreću u najvećem dijelu usmjere na poboljšavanje teškog položaja u kojem se nalaze osobe sa invaliditetom, žrtve porodičnog nasilja i građani koji žive ispod linije siromaštva. U vezi sa dostavljenom inicijativom, Vlada Federacije Bosne i Hercegovine donijela je Zaključak V.broj: 1228/2023 od 21.09.2023. godine, koji je rezultirao Inicijativom ovog Ministarstva prema Federalnom ministarstvu finansija za održavanje sastanka.

DOKAZ: Uvid u Inicijativu, Zaključak Vlade Federacije Bosne i Hercegovine i Molbu za održavanje sastanka, objavljene na web stranici ministarstva www.fmrsp.gov.ba, u obavijesti pod naslovom Hornologija – Javni

konkurs za finansiranje projekata i programa iz sredstava dijela prihoda ostvarenih u Budžetu FBiH po osnovu naknada za priređivanje igara na sreću

S obzirom da je veliki broj aplikacija dostavljenih na poništeni Javni konkurs sadržavao nedostatke tehničke prirode, Ministarstvo je prije raspisivanja ponovnog Javnog konkursa, u skladu sa Uredbom, donijelo nove Upute o za podnošenje prijave na Javni konkurs za finansiranje projekata i programa iz sredstava dijela prihoda ostvarenih u Budžetu Federacije Bosne i Hercegovine po osnovu naknada za priređivanje igara na sreću broj: 07-02/3-1942-1/23 od 23.05.2023. godine, koje su odmah po njihovom donošenju dostavljene Federalnom ministarstvu finansija, te objavljene na web stranici Ministarstva. Navedenim Uputama je prepoznat problem velikog broja aplikacija sa tehničkim nedostacima koji je nastao kao posljedica stupanja na snagu pomenute Uredbe o izmjenama i dopunama Uredbe, te je Uputama predviđena mogućnost otklanjanja formalnih nedostataka kao što su nedostatak potpisa ili pečata, izostavljanje određenog podatka, te pojašnjenje određenih nejasnoća u dostavljenoj dokumentaciji.

S tim u vezi, naglašavam da su netačni navodi iz Vašeg pitanja da sam tokom trajanja Javnog poziva mijenjao konkursnu proceduru i Uredbu kojom je regulisan način podjele novca. Prije svega, isti su netačni iz razloga što Uredbu ne mogu mijenjati ja kao federalni ministar rada i socijalne politike, već isključivo Vlada Federacije Bosne i Hercegovine, kao što je to učinila prethodna Vlada, te donošenjem Uredbe o izmjenama i dopunama Uredbe udruženja osoba sa invaliditetom stavila u još nepovoljniji položaj. Također, netačno je da se bilo kakva procedura mijenjala u toku trajanja Javnog konkursa, s obzirom da su Upute donesene 23.05.2023. godine, te kao takve objavljene na web stranici Ministarstva i dostavljene Federalnom ministarstvu finansija, a tek je potom dana 24.05.2023. godine, raspisan ponovni Javni konkurs.

DOKAZ: Uvid u Upute o za podnošenje prijave na Javni konkurs za finansiranje projekata i programa iz sredstava dijela prihoda ostvarenih u Budžetu Federacije Bosne i Hercegovine po osnovu naknada za priređivanje igara na sreću broj: 07-02/3-1942-1/23 od 23.05.2023. godine, objavljene na web stranici ministarstva www.fmrsp.gov.ba, u obavijesti pod naslovom Hornologija – Javni konkurs za finansiranje projekata i programa iz sredstava dijela prihoda ostvarenih u Budžetu FBiH po osnovu naknada za priređivanje igara na sreću

Na osnovu navedenog, Ministarstvo je dana 24.05.2023. godine, raspisalo ponovni Javni konkurs za finansiranje projekata i programa iz sredstava dijela prihoda ostvarenih u Budžetu Federacije Bosne i Hercegovine po osnovu naknada za priređivanje igara na sreću.

DOKAZ: Uvid u objavu ponovnog Javnog konkursa za finansiranje projekata i programa iz sredstava dijela prihoda ostvarenih u Budžetu Federacije Bosne i Hercegovine po osnovu naknada za priređivanje igara na sreću, objavljenog na web stranici ministarstva www.fmrsp.gov.ba, u obavijesti pod naslovom Hornologija – Javni konkurs za finansiranje projekata i

programa iz sredstava dijela prihoda ostvarenih u Budžetu FBiH po osnovu naknada za priređivanje igara na sreću

Radi postizanja većeg nivoa transparentnosti u vezi sa provođenjem postupka, Ministarstvo se aktima broj: 07-11/13-1963/23 od 05.06.2023. godine, obratilo Centrima civilnih inicijativa i Transparency International Sarajevo, te zatražilo da predlože svoje članove radi imenovanja u Komisiju za ocjenu formalne ispravnosti zahtjeva podnesenih na ponovni Javni Konkurs. Dakle, Ministarstvo je od samog početka provođenja pomenute procedure postupalo sa namjerom da se u cijelom postupku, pored zakonitosti, osigura i što veći stepen transparentnosti, uključivanjem i nevladinog sektora u isti.

DOKAZ: Uvid u akte Ministarstva upućene CCI-u i Transparency Internationalu Sarajevo, te odgovor Transparency International Sarajevo, objavljen na web stranici ministarstva www.fmrsp.gov.ba, u obavijesti pod naslovom Hornologija – Javni konkurs za finansiranje projekata i programa iz sredstava dijela prihoda ostvarenih u Budžetu FBiH po osnovu naknada za priređivanje igara na sreću

Naime, na ponovni Javni konkurs je pristiglo 195 prijava, od kojih je 147 ispunilo zahtjeve u pogledu formalne ispravnosti, dok je 48 zahtjeva ocijenjeno kao formalno neispravno, što je predstavljalo znatno veći broj formalno ispravnih zahtjeva u odnosu na ishod poništenog Javnog konkursa, gdje je podsjećanja radi samo 57 prijava bilo formalno ispravno. Veći broj formalno ispravnih aplikacija koje su zadovoljile uslove da pređu u narednu fazu ocjene i bodovanja predloženih projekata, je dokaz opravdanosti poništavanja prethodno objavljenog Javnog konkursa. Postupajući u skladu sa postupkom propisanim Uredbom i Uputama, Ministarstvo je nastavilo proceduru, te putem nadležne Komisije pristupilo ocjeni i bodovanju projekata, odnosno onih aplikacija koje su ispunile uvjete u pogledu formalne ispravnosti. Nakon što je nadležna Komisija za ocjenu i bodovanje predloženih projekata okončala svoj rad, utvrđeno je da je od pomenutih 147 aplikacija, njih 68 prešlo potrebnii prag bodovanja, te je za iste predložena raspodjela sredstava. S tim u vezi, Ministarstvo je pripremlilo Prijedlog odluke o raspodjeli sredstava, odnosno o utvrđivanju liste korisnika i raspodjeli dijela prihoda ostvarenih po osnovu naknada za priređivanje igara na sreću, te isti u skladu sa odredbama Poslovnika o radu Vlade Federacije Bosne i Hercegovine – prečišćen tekst („Službene novine Federacije BiH“, br. 6/10, 37/10, 62/10, 39/20 i 67/21), dostavilo Federalnom ministarstvu finansija i Uredu Vlade Federacije Bosne i Hercegovine za zakonodavstvo i usklađenost sa propisima Evropske unije, radi davanja mišljenja.

DOKAZ: Uvid u Prijedlog odluke dostavljen Federalnom ministarstvu finansija i Uredu Vlade Federacije Bosne i Hercegovine za zakonodavstvo i usklađenost sa propisima Evropske unije, objavljen na web stranici ministarstva www.fmrsp.gov.ba, u obavijesti pod naslovom Hornologija – Javni konkurs za finansiranje projekata i programa iz sredstava dijela prihoda ostvarenih u Budžetu FBiH po osnovu naknada za priređivanje igara na sreću

Na osnovu navedenog, Ured Vlade Federacije Bosne i Hercegovine za zakonodavstvo i usklađenost sa propisima Evropske unije, kao organ nadležan za davanje mišljenja

o usklađenosti prijedloga pravnih akata sa Ustavom, zakonima i pravnim sistemom, na dostavljeni Prijedlog odluke dao je mišljenje bez primjedbi u vidu usklađenosti sa zakonom, dok je Federalno ministarstvo finansija dostavilo mišljenje sa određenim primjedbama koje su se odnosile na postupak objave ponovnog Javnog konkursa i donošenje Uputa, dok u dijelu raspodjele sredstava, za što je Federalno ministarstvo finansija i nadležno, isto nije imalo bilo kakve primjedbe. Naime, prema pomenutom Poslovníku o radu Vlade Federacije Bosne i Hercegovine, Ured Vlade Federacije Bosne i Hercegovine za zakonodavstvo i usklađenost sa propisima Europske unije daje mišljenje u pogledu usklađenosti prijedloga pravnih akata sa Ustavom, zakonima i pravnim sistemom, dok Federalno ministarstvo finansija daje mišljenje isključivo u pogledu finansijskih sredstava potrebnih za izvršenje, za koje u svom mišljenju nije imalo primjedbi.

DOKAZ: Uvid u mišljenja Federalnog ministarstva finansija i Ureda Vlade Federacije Bosne i Hercegovine za zakonodavstvo i usklađenost sa propisima Europske unije, objavljena na web stranici ministarstva www.fmrsp.gov.ba, u obavijesti pod naslovom Hornologija – Javni konkurs za finansiranje projekata i programa iz sredstava dijela prihoda ostvarenih u Budžetu FBiH po osnovu naknada za priređivanje igara na sreću

Kada su u pitanju date primjedbe ističemo da navodi Federalnog ministarstva finansija kako Uredbom i materijalnim propisom koji reguliše ovu oblast nije omogućena procedura poništenja javnog konkursa nemaju uporište u konkretnim odredbama nego su paušalna ocjena primjene propisa. Naime, ni Uredbom, a niti Zakonom o igrama na sreću nije izričito propisano da je zabranjeno poništiti navedeni javni konkurs, a osnovno pravno načelno prilikom tumačenja općih propisa, koje konzumiraju i sudovi svih nivoa, jeste da sve što nije izričito, dakle imperativnom normom zabranjeno, dozvoljeno je. Argumentacija povrede načela transparentnosti također nema utemeljenje. Naprotiv, Ministarstvo je, u konkretnom slučaju, poništilo navedeni Javni konkurs jer je od 159 prijava kao formalno pravno neispravno ocjenjeno čak njih 102. Dakle, čak oko 64% prijava aplikantata nije ušlo u daljnju konkursnu proceduru. Također, naglašavamo kako je očito da poništenjem prvog raspisanog Javnog poziva, niko nije oštećen, s obzirom da je svima pod jednakim uvjetima omogućeno da apliciraju po drugom objavljenom javnom pozivu, a postupak se pokazao opravdanim jer je veći broj aplikanta ušao u proceduru i prošao selekciju odabira, a što je krajnji cilj i svrha raspodjele ovih sredstava. U vezi sa navodima koji se odnose na izmjene i donošenje novih Uputa, naglašavamo da je Ministarstvo Federalnom ministarstvu finansija dana 02.06.2023. godine dostavilo Upute za podnošenje prijave na Javni konkurs za finansiranje projekata i programa iz sredstava dijela prihoda ostvarenih u Budžetu Federacije Bosne i Hercegovine po osnovu naknada za priređivanje igara na sreću, a na koje nisu imali bilo kakve primjedbe i/ili sugestije. Nejasno je, kako se tek nakon sačinjavanja Prijedloga odluke, od strane Federalnog ministarstva finansija iznose određene primjedbe, a da prilikom prijema Uputa, iste nisu imali. Pored navedenog, ističemo da je Ministarstvo donijelo i objavilo Upute prije raspisivanja ponovnog javnog poziva, pa su netačni navodi Federalnog ministarstva finansija kako su Upute donesene nakon raspisivanja javnog poziva. Također, nisu osnovani navodi iz datog mišljenja kako se Upute mogu mijenjati samo jednom godišnjem jer bi to predstavljano pravni nonsens, s obzirom da se prema takvom mišljenju sve eventualne suprotnosti u odnosu na Uredbu, ne bi mogle mijenjati sve do početka

nove kalendarske godine. Nadalje, netačni su navodi iz datog mišljenja kako je Ministarstvo postupilo suprotno odredbi člana 8. stav 4. Uredbe. Naime, donesenim Uputama nije propisano, kako se to u mišljenju navodi, mogućnost dopune dokumentacije, već je podnositeljima prijave data mogućnost da, ukoliko u prijavnim obrascu i podnesenim dokumentima postoje određene nejasnoće, ukoliko nedostaje potpis ili pečat i sl, isto pojasne nadležnoj komisiji i otklone utvrđene nedostatke, a nikako da dostavljaju dodatnu dokumentaciju. Naime, ovakva odredba je propisana isključivo iz razloga što je na poništenom javnom pozivu veliki broj prijava odbačen kao formalno neispravan iz nerelevantnih razloga (npr. određeni aplikanti su propustili potpisati prijavni obrazac koji su uredno poslali ili u prijavnim obrascu propustili navesti broj transakcionog računa, a pri tome su priložili ugovor sa bankom iz kojeg je vidljiv isti i sl). S tim u vezi, ističemo kako smatramo da je Federalno ministarstvo finansija ušlo u ocjene koje ne bi trebalo biti predmet mišljenja koje daje u okviru svoje nadležnosti, te koje ranije u istim slučajevima nije razmatralo niti kod ovog niti drugih ministarstava.

DOKAZ: Uvid u Izjašnjenje Ministarstva na mišljenje Federalnog ministarstva finansija, objavljeno na web stranici ministarstva www.fmrsp.gov.ba, u obavijesti pod naslovom Hornologija – Javni konkurs za finansiranje projekata i programa iz sredstava dijela prihoda ostvarenih u Budžetu FBiH po osnovu naknada za priređivanje igara na sreću

S obzirom da je Federalno ministarstvo finansija imalo i određene primjedbe tehničke prirode na sam tekst Prijedloga odluke, iste su prihvaćene, te je korigovani Prijedlog odluke o raspodjeli navedenih sredstava dostavljen Vladi Federacije Bosne i Hercegovine, radi razmatranja i donošenja.

DOKAZ: Uvid u prijedlog Odluke dostavljen Vladi Federacije BiH, objavljen na web stranici ministarstva www.fmrsp.gov.ba, u obavijesti pod naslovom Hornologija – Javni konkurs za finansiranje projekata i programa iz sredstava dijela prihoda ostvarenih u Budžetu FBiH po osnovu naknada za priređivanje igara na sreću

Imajući u vidu date primjedbe Federalnog ministarstva finansija, te činjenicu da upućeni Prijedlog odluke nije razmatran od strane Vlade Federacije Bosne i Hercegovine, Ministarstvo se aktom broj: 07-11/13-1963/23 od 03.10.2023. godine, samoinicijativno obratilo Jedinici za budžetsku inspekciju te zatražilo inspekcijski nadzor nad provođenjem postupka po ponovnom Javnom konkursu u Ministarstvu. Dakle, akt kojim se Ministarstvo samoinicijativno obratilo Jedinici za budžetsku inspekciju, datira od 03.10.2023. godine, što je dokaz da je Ministarstvo skoro mjesec dana prije nego što su se određene neprovjerene informacije i optužbe pojavile u medijima, već zatražilo da se utvrdi zakonitost provedenog postupka, što će na kraju i opredijeliti njegov ishod.

DOKAZ: Uvid u zahtjev Ministarstva upućen Jedinici za budžetsku inspekciju, objavljen na web stranici ministarstva www.fmrsp.gov.ba, u obavijesti pod naslovom Hornologija – Javni konkurs za finansiranje projekata i programa iz sredstava dijela prihoda ostvarenih u Budžetu FBiH po osnovu naknada za priređivanje igara na sreću

Imajući u vidu da inspekcijski nadzor nije okončan do dana sačinjavanja ovog odgovora, te da Vlada Federacije Bosne i Hercegovine nije nikada ni razmatrala dostavljeni Prijedlog odluke o raspodjeli sredstava, to sredstva prikupljena od igara na sreću u iznosu od 728.458,82 KM nisu još uvijek dodijeljena nijednom pojedinačnom aplikantu, niti će biti isplaćena ukoliko se u postupku nadzora utvrdi bilo kakva manjkavost vezana za proceduru ponovnog raspisivanja Javnog konkursa.

S tim u vezi, ističem kako su netačni navodi iz Vašeg pitanja da sam prekršio procedure i federalne propise kada sam donio Odluku o raspodjeli prihoda u iznosu od 728.458,82 KM prihoda ostvarenih po osnovu naknada za priređivanje igara na sreću, iz razloga što pomenutu odluku uopće ne donosim ja kao federalni ministar rada i socijalne politike, već istu donosi Vlada Federacije Bosne i Hercegovine, s tim da ta odluka uopće nije ni razmatrana na sjedinici Vlade Federacije Bosne i Hercegovine, zbog čega nije mogla biti ni donesena. U vezi sa navedenim, apelujem i na Vas, kao i na ostale poslanike i delegate da prilikom iznošenja određenih pitanja u javnosti „o pomolu novih afera“ kako navodite, prvo pribavite tačne informacije, kako od strane Vas i drugih u javnost ne bi bile plasirane netačne informacije, počev od iznosa predviđenih sredstava pa do činjenice da ista još nisu ni dodijeljena.

Na kraju ističem, da je cjelokupna situacija u vezi sa provođenjem pomenutog Javnog konkursa u najvećem dijelu rezultat donošenja pomenute Uredbe o izmjenama i dopunama Uredbe, koju je donijela prethodna Vlada, a kojim je, između ostalog, ukupan iznos pomenutih sredstava koji ovo Ministarstvo dodjeljuje za zadovoljavanje potreba lica sa invaliditetom u smislu poboljšanja životnih uslova i rada njihovih organizacija, umanjen za 30% što u praksi predstavlja iznos od oko 1,2 miliona KM, te je isti rapoređen za finansiranje projekata iz oblasti kulture i sporta. Ne sporim da treba ulagati i u razvoj tih oblasti, ali smatram da bi prioritet ipak trebali biti projekti namijenjeni osobama, posebno djeci sa invaliditetom.

S poštovanjem,



CO:

- Kabinet sekretara Predstavničkog doma Parlamenta Federacije Bosne i Hercegovine
n/r gosp. Ivan Miličević, sekretar
(veza: Vaš akt broj: 05/1-02-408/23 od 30.10.2023. godine)

- Vlada Federacije Bosne i Hercegovine
n/r gđa mr. sc. Edita Kalajdžić, sekretar
(veza: Vaš akt broj: 03-04-1253-24/23 od 31.10.2023. godine)